

植物名實圖考

植物名實圖考卷之七

固始吳其濬著

蒙自陸應穀校刊

山草

人參

黃耆

甘草

赤箭

朮

沙參

遠志

二圖

萎蕤

巴戟天

肉苁蓉

升麻

丹參

徐長卿

防風

獨活

細辛

柴胡

大柴胡

廣信柴胡

附

小柴胡

黃連

防葵

黃芩

白薇

白鮮

知母

貝母


元參

紫參

紫草

秦艽

黨參附



人參 說文作藟廣雅作蔘俗作參

人參本經上品昔時以遼東新羅所產皆不及上黨今以遼東吉林爲貴新羅次之其三姓甯古塔亦試採不甚多以苗移植者爲秧參種子者爲子參力皆薄黨參今係蔓生頗似沙參苗而根長至尺餘俗以代人參殊欠考覈謹按我

朝發祥長白山周原臙臙董茶如飴固天地之奧區九州之上腴也長林豐草中夜有光燭厥惟人參定制私創者舉其物罰其人官給商引出卡分採歸以所得上之官官視其參之多寡而納課焉課畢獻於內府第其品上上者備

御其次以爲班賞凡文武二品以上及侍直者皆預臣父臣兄
備員卿貳歲蒙

恩資臣供奉 南齋時疊承

優錫其私販越關入公者亦蒙分賞自維臣家俱飫仙藥愧長
生之無術荷

大造之頻施敬紀顛末用示後人考圖經繪列數種多沙參薺
芫輩今紫團參圖已墜爲田所見舒城施南山參尙不及黨參
滇姚州麗江亦有參形旣各異性亦多燥惟朝鮮附庸 陪都

所產雖出人功而氣味具體人間服食至廣卽外裔如緬甸亦

由京都販焉



黃耆

黃耆本經上品有數種山西蒙古產者佳滇產性瀉不入用
雩婁農曰黃耆西產也而淳安縣志云嘉靖中人有言本地出
黃耆者當道以文索之無有以俗名馬首苜蓿根充之醫生解
去遭杖幾斃不得已解價至三四十金而後已嗚呼元王物土
宜而布之利後世乃以利爲害乎夫任土作貢三代以來莫之
能改然徵求多而饋問廣猶慮爲民病洛陽兒女之花黃田荔
支之譜轉輸千里容悅俄時賢者有餘憾矣舊時滇元江有荔
支以索者衆今並其樹刈之昆明海亦時有蝦漁者懼索得而

匿之不敢以售於市民之畏官乃如鬼神哉吾見志乘於物產不曰地窮不毛則曰昔有今無懼上官之按志而求也意亦苦矣然吾以爲未探其本而因噎而廢食也邑志物產非注爾雅以淹博考證爲長又非如賦京都者假他方之所有以誇靡富考其山林川原則知所宜考其所宜則知民之貧富勤惰職方氏曰其利金錫竹箭其畜宜六擾其穀宜五種不爲後世有貪墨者而稍減而諱之也雖然以志乘而累及官民者亦有之矣夫天下之稻一也而弋陽志則曰其稻他縣不能有也昔因以索弋稻爲累矣天下之猪一也而贛州志則曰龍猪他郡不能

及也昔國以索龍猪爲累矣志物者一時泚筆而矜其名幸邑者因其所矜以媚其上浸假而爲成例橫徵旁求饋者竭矣受者未厭有強項吏遷延不致則譙責隨之故天下病民病官之弊皆獻諛者實尸其罪然則作志者必當曰邑某里山澤其穀畜果蔬宜某種某里原隰其穀畜果蔬宜某種某里陜瘠無宜也則民衣食之所資而窮富著矣林木萑葦出某里藥草花蔴出某里則民養生送死薪炊種藝所賴也林木必著其所用藥物必究其所主旣述其培植之勞又記其水陸之阻則物力之貴賤難易又著矣若其金錫羽毛非盡地所宜則必悉其得之

之艱出入之數凡民生之不易皆反覆三致意焉使良有司按
志而知若者宜因勢而導若者宜改而更張或種葱及薤或拔
茶植桑交趾荔支之書坊州杜若之駿孔戮菜蚶之疏于厚捕
蛇之說民生疾苦洞若觀火於以補偏救弊利用厚生王道之
始雖聖賢豈能舍此而富民哉否則如淳安志所云強其無以
瀆貨彼若索志乘而觀之不將失其所恃歟

甘草

六

山草卷之七



甘草


甘草本經上品爾雅藟大苦郭注今甘草夢溪筆談謂甘草如槐而尖形狀極確詩經采苓采苓首陽之巔首陽在今蒲州府晉俗摘其嫩芽溲麪蒸食其味如飴疑采苓亦以供茹也

零婁農曰甘草藥之國老婦稚皆能味之郭景純博物注爾雅藟大苦曰今甘草也蔓延生葉似荷或云藟似地黃甘草殊不蔓生亦不類荷蓋傳聞異或傳寫訛與地黃尤非類或之者疑之也陶隱居亦云河西上郡今不復通市今從蜀漢中來堅實者是枹罕草最佳晉之東遷西埽隔絕江左諸儒不復目驗宋

圖經謂河東蒲坂甘草所生先儒注首陽采苓苗葉與今全別
豈種類不同云云殆以舊說流傳不敢顯斥沈存中乃初謂郭
注蔓延似荷者爲黃蘗今之黃蘗何曾似荷爾雅翼云不惟葉
似荷古之蓮字亦通於藹則直以音聲相通不復顧形實迥別
矣廣雅疏證斥沈說之非而以圖經諸說爲皆不足信經生家
言墨守故訓固與辨色嘗味起疴肉骨者道不同不相謀也余
以五月按兵塞外道傍轍中皆甘草也諦葉玩藹却車載之聞
甘涼諸郡尤肥壯或有以爲杖者蓋其地沙浮土鬆根莖直下
可數尺年久則巨耳梅聖俞有司馬君實遺甘草杖詩可徵於

古余嘗見他處所生亦與圖經相肖嘗之味甘人無識者隱居
所謂青州亦有而不好者殆其類也

箭赤州克



箭赤



赤箭

赤箭本經上品陶隱居未能決識夢溪筆談謂卽天麻止用治風爲可惜本草綱目謂卽還筒子考柳公權有求赤箭帖以爲扶老之用則宋以前尙爲服食要藥

朮

九

山草卷之七



朮

朮本經上品爾雅朮山薊楊枹薊圖經以楊枹爲白朮宋以後始分蒼白二種各自施用

雩婁農曰楊枹薊注以爲馬薊范汪以馬薊爲續斷李時珍以馬薊爲大薊乃又以爲白朮朮名山薊安得卽以薊爲朮昔產朮者漢中南鄭也蔣山茅山也浙也歛也幕府山也昌化也池州也東坡云黃州朮一斤數錢此長生藥也舒州朮花紫難得余莅江右則饒州九江皆有之莅湘南則幕府山所產頗大力亦不劣山西葫蘆峪產朮甚肥壯土人但以蒼朮用之南方草

本狀藥有乞力伽朮也瀕海所產有至數斤者深山大壑殆必
有如瀕海者特未遇耳仙傳拾遺紀劉商得真朮爲陰功篤行
之所感然則服朮而無效所得者乃薊屬而非真朮耶晉侯得
良醫而二豎居於膏肓本事方載以翦草治血疾而鬼覆其鑑
無功德而訪仙藥固緣木求魚狂惑之疾雖得良醫真藥亦何
益之有




沙參

沙參本經上品處處皆有以北產及太行山爲上其類亦有數種詳救荒本草花與薺芎相同惟葉小而根有心爲別



遠志

遠志本經上品爾雅萋繞棘菟注今遠志也似麻黃赤華葉銳而黃語約而形容畢肖說文菟棘菟繫傳卽遠志又萋草也四月秀萋劉向說此味苦苦萋則萋與萋繞異物釋詩者或卽以萋爲遠志圖經載數種所謂似大青而小三月開花白色者不知何處所產今太原產者與救荒本草圖同原圖解州遠志不應與太原產迥異李時珍謂有大葉小葉二種滇南甜遠志葉大花黃土人亦不以入劑蓋習用之品藥肆所採較當時州郡圖上者爲可信也





菱藎

十四

山草卷之七



菱鞋

菱鞋卽本經女鞋上品爾雅榮委菱蓋本經亦是委菱脫去委字上半遂訛爲女菱救荒本草云其根似黃精而小異今細核有二種一葉薄如竹葉而寬根如黃精多鬚長白卽菱鞋也一葉厚如黃精葉圓短無入根亦多鬚俚醫以爲別種李衍竹譜亦俱載之

零婁農曰古有委菱或以爲卽葳鞋目爲瑞草而黃精乃後出諸書以委菱類黃精然則古方蓋通用矣陳藏器以青黏卽菱鞋東坡初閱嘉祐本草乃知青黏是女菱喜躍之至而又不

盡信夫毛女食黃精而輕捷翻飛如猿猱委萎得無類是獨恠
漆葉人所盡知而醫方決不復用然則卽有華佗與之以方其
肯盡信乎大抵山居谷汲之民不見外事無芻豢以濁其口腹
無靡曼以濁其耳目無欣戚以濁其神明獠獠狃狃湛然太古
草木之實皆自然五穀南陽飲菊水崖州食甘藷皆獲上壽彼
服委萎者卽不地仙亦當卻病難老後世貴極富溢乃思神仙
秦皇漢武姑不具論李贊皇高駢皆惑於方士宋之朝臣多服
丹石又希黃白藏腑薰灼毒發致危良醫又製解丹毒之藥以
拯之其亦不智也已記小說一事山水陸發有物與木石俱下

苔髮鬢髮鄉人別而視之乃人也蓋閉息不知幾年而飛昇無術塊然無知者然其神氣清固遠近聞以爲仙爭迎供之初尙內視漸思飲食未幾而茹葷酒又未幾而思人道叩之者旣無要訣可傳卒以醉愆而死然則無靈根而得妙術天上豈有愚盲神仙耶噫嘻天上又豈有不忠孝神仙耶聖人云未知生焉知死若是知生便是不死

接近時所用萎蕤通呼玉竹以其根長白有節如竹也與黃精絕不類其莖細瘦有斑圓綠叢生葉光滑深綠有三勒道背淡綠凸文滇南經冬不隕逐葉開花結青紫實與爾雅異

巴戟天

歸州巴戟天

涪州巴戟天



六

山草卷之七

本草綱目卷之三
三
巴戟天

巴戟天本經上品唐本草注俗名三蔓草葉似茗經冬不枯圖
經辨別真僞甚晰

肉蓯蓉

七

山草卷之七



肉蓯蓉

肉蓯蓉本經上品圖經云人多取草蓯蓉以代肉者今藥肆所售皆鹹製有鱗甲形扁色黑柔軟

升麻

十六

山草卷之七



升麻

升麻本經上品圖經葉似麻葉四五月花如粟穗白色實黑根紫今江西湖廣有土升麻與圖經異別入草藥

零婁農曰漢書地理志益州牧靡李奇注靡音麻卽升麻解毒菜酉陽雜俎建寧郡有牧靡山鳥食鳥喙中毒輒飛集牧靡喙牧靡草以解之則升麻固滇產也滇多鳥喙其俗方所用者蓋真升麻也葉如麻而花作穗與圖經茂州升麻符滇與蜀接固應同彙但圖經又列滁州秦州漢州三種漢州產者形如竹筍今湖北土醫用以升表痘瘡者其狀正同其餘枝葉皆相彷彿

或卽隱居所謂落新婦者江西產者花如絮未知卽滁州一類
否也李時珍盛稱升提之功然未述其狀僅有外黑內白俗謂
鬼臉升麻一語其何地所產耶圖經四種判若馬牛其果功用
俱同耶聖人有言未達不敢嘗不覩厥物聽命賣藥之手可以
謂之達耶藥之生也或離鄉而貴或遷地弗良醫不三世不服
其藥以其明於風土所宜人情所愜非貿貿者取所不知之物
以試其驗與否也然則四方游手負藥籠以奔走逐食者小則
貪人病之痊以索酬大則用迷惑之藥以肆劫彼有意安民者
得不如鷹鷂之逐鳥雀乎慶鄭曰古者大事必乘其產生其水

土而知其人心安其教訓而服習其道用藥者亦何獨不然余
閱世之尙遠賤近者不曰海舶之珍藥則曰賈胡之齋劑試思
農皇所嘗不聞逾海青囊一卷豈來流沙彼四裔之仰給大黃
茶葉者亦曰非此不能生活不知文軫未播桂海聲教未燭冰
天時彼何以蕃其種族耶嗚呼以跬步之居而欲習梯航之俗
衛出公之好夷言趙武靈之爲胡服其用夷變夏抑用夏變夷
五百年後當有知之者



丹參

丹參本經上品處處有之春花亦有秋花者南方地暖得氣早耳



徐長卿

徐長卿本經上品唐本草注所在川澤有之葉似柳兩葉相當有光澤根如細辛微粗長黃色有臊氣蜀本草子似蘿摩子而小核其形狀蓋卽湖南俚醫所謂土細辛一名九頭師子草惟諸書都未詳及其花爲疑


粵婁農曰老子云大道無名天非道耶顯而在上不名天耶聖非道耶大而能化不名聖耶然何奴謂天爲樽犁則不以天名天西方謂聖爲佛則不以聖名聖不以其名名則天與聖果定名耶醯雞以甕爲天豈非天而天之耶酒客以清爲聖豈非聖

而聖之耶降而至於人物其名非所獨耶然子車鍼虎也叔孫豹也閔子馬也令尹子蘭也非物也人無名以物名名豈以物之名而物之耶而物之爲蠅虎爲謝豹爲駸馬爲馬蘭者又豈以人名之而靳物名之耶長卿也王孫也都郵也使君也非人也物無名以人名名豈以人之名而人之耶而人之爲長卿爲王孫爲都郵爲使君者又豈以物名之而諱人名之耶言明實者曰鳥不鳥鵲不鵲謂名鳥必鳥名鵲必鵲耶然天下之大萬彙之繁皆如鳥之可名鵲之可名耶抑能使侏禁侏離之語名鳥必呼鳥名鵲必呼鵲耶由是推之封邑郡國名之以別疆域

也古今地理之名有定耶公卿尹士名之以別貴賤也古今職
官之名有定耶地志無定而疆域改以名改疆域耶抑以疆域
改名耶官志無定而貴賤易以名易貴賤耶抑以貴賤易名耶
執實求名則名斯在執名求實則名斯浮名者實之賓天下豈
有一定之賓耶故君子不爲名

防風

山草卷之七



防風

防風本經上品圖經石防風出河中又宋毫間出一種防風作菜甚佳恐別一種本草綱目江淮所產多是石防風俗呼珊瑚菜安徽志山葵葉翠如雲正二月間泥露抽苗香甘異常土人美其名曰珊瑚菜懷遠桐城太和俱出蓋卽石防風也今從救荒本草圖之山西山阜間多有與救荒圖同而葉稍肥

獨活

三

山草卷之七



獨活


獨活本經上品圖經獨活羌活一類二種近時多以土當歸充之湖南產一種獨活頗似萊菔葉布地生有公母母不抽莖入藥用公者抽莖紫白色支本不圓如筧狀末迺圓枝或三葉或五葉有小鋸齒土人用之恐別一種雲南獨活大葉亦似土當歸而花杈無定粗糙深綠與圖經文州產畧相彷彿今圖之存原圖五種



細辛

三

山草卷之七



細辛

細辛本經上品圖經他處所出不及華山者真夢溪筆談以爲南方所用細辛皆杜蘅今江西俚醫以葉大而圓者爲杜蘅葉尖長者爲細辛殊有分別過劑亦能致人氣脫而死不必華山所產

雩婁農曰圖經列細辛已數種而及已鬼都督杜蘅輩又復相似今江西湘滇所用細辛輒與本草不類然皆能發汗脫陽夫參朮朮草種既不繁醫者或以他藥代之不能效且誤人病彼搜伐侵削之品何其多也韓信謂漢高不善將兵而善將將古

來名將如林而能將將者其郭令公曹武惠乎良醫必如太倉公華佗然後可用毒藥而不戕人專閫必如郭令公曹武惠然後可用毒將而不縱兵否則謹斥埃嚴刁斗明軍令以行之不妄殺者上將也慎佐使量緩急度病勢而用之不失一者上醫也將不可妄遣藥不可妄投事有大小而能死人則一而已周官瘍醫療瘍以五毒之藥攻之易師卦之象曰聖人以此毒天下然則良醫之用藥聖人之用兵能起白骨登衽席而未嘗不深知其毒而慎之彼喜方而誇良藥好武而事佳兵者誠哉其不祥也

柴胡

三七

山草卷之七



柴胡 本作芑胡通作柴

柴胡本經上品陶隱居已以芸蒿爲柴胡圖經有竹葉斜蒿葉
麥冬葉數種今藥肆所蓄不知何草江西所出已非一類醫者
以爲傷寒要藥發散之劑無不用者誤人至死相承不悟蓋不
知非眞柴胡也本草衍義以治勞方用之目擊人死况非柴胡
可輕投耶今以山西滇南所產圖之又一種亦附圖蓋北柴胡
也餘皆附後以備稽考世有哲人非銀州所產慎勿入方

粵婁農曰柴胡一名山菜固可茹者圖經具丹州兗州淄州江
寧壽州五種有竹葉麥門冬葉斜蒿葉之別唐本草以芸蒿爲

謬李時珍亦謂斜蒿葉最下柴胡以銀夏爲良而圖經又無銀州所上者唯山西所產及救荒本草圖與蘇說同滇南有竹葉麥門冬葉二種土人以大小別之與丹州壽州者相類江西所產則不識爲何草李時珍以本草衍義不分藏腑經絡有熱無熱一概擯斥爲非余謂得真柴胡固當審脈用湯否則以寇說爲穩李時珍旣謂銀柴胡不易得而用北柴胡矣儻鄉曲中又無北柴胡可任土醫以不知何草投之而謂此症必用此藥乃望其治勞退瘧乎抑無此藥而遂委而去乎世以逍遙散爲清熱及婦科要劑余見有愈服愈甚者方誤耶抑藥誤耶趙括與

其父奢論兵奢不能難其所讀兵書固卽其父書也而勝敗相反者同甘苦之卒與離心之士也廉頗一爲楚將無功曰我欲得趙人廉頗之將一也而能用趙不能用楚知趙人之強弱而不知楚人之強弱也不知之而用之其不僨事者幾希故曰知人難而任人易醫者不知藥而用方固趙括之易言兵也君以爲易其難也將至矣

大柴胡

五

山草卷之七



大柴胡

大柴胡產建昌初生葉鋪地如馬蘭葉而大深齒紫背獨莖上青下微紫梢葉微窄亦有齒稍細頂頭開尖瓣小白花黃蕊密長秋深含苞冬月始開一花旬餘不萎賣藥人以爲大柴胡微似救荒本草竹葉柴胡而花異



廣信柴胡

附

柴胡產廣信叢生形狀頗似三白草紫莖柔脆葉面青背微白有直紋六七縷土人以爲柴胡志乘亦云地產柴胡按之圖經絕不相類不知何草

小柴胡



小柴胡

小柴胡江西山坡亦有之葉似大柴胡而窄秋時梢頭開花似細絲赭色成毬攢簇枝頭土醫謂爲小柴胡

黃連

三

山草卷之七



黃連

黃連本經上品今用川產其江西山中所產者謂之土黃連又一種胡黃連生南海及秦隴蓋卽土黃連之類湖北施南出者亦良


雩婁農曰黃連苦寒而漢武內傳封君達服黃連五十餘年神仙傳黑穴公服黃連得仙此非蔡誕欺人語耶秦少游論服黃連苦參久而反熱其理極微而東坡乃謂指麾使姚歡服黃連愈癬疥而髮不白其法酒浸焙乾密丸酒吞每二十九或其人血過於熱得此潤肺而行以酒故效若人人而用之其可乎哉

王微贊闡命輕身江淹贊長靈久視皆拾道書剩語耳俗名楷
木爲黃連木其葉味苦微相類丹陽縣志黃連山樹大十圍卽
此

防葵

五

山草卷之七



防葵

防葵本經上品宋圖經云惟出襄陽葉似葵花如蔥花及景天根香如防風陶隱居誤以爲與狼毒同根以浮沉爲別別錄云中火者不可服令人恍惚見鬼與本經戾唐本草及本草拾遺皆辨之本草綱目仍與狼毒同入毒草今移入山草

雩婁農曰甚矣君子之不可與小人爲緣也防葵上品陶隱居以爲狼毒同根後人雖爲辨白而方藥無用防葵者矣蔡中郎嘆董卓之誅玉川子罹王涯之黨身旣爲戮而後世猶以無保身之哲爲咎堅不磷白不淄聖人則可賢人則不可班孟堅作古

今人表品第不盡衷於道其原傳可考也陶隱居論藥物未可
全憑本草經具在若晉之九品流別出於中正一經下品遂同
禁錮人之自立與論人者不當知所懼哉若謂草木無知任其
毀譽則以輕薄處物必不能以忠厚待人



本草綱目卷之九
三三
黃芩

黃芩本經中品圖經及吳普本草具載形狀而大小微異今入藥以細者良

雩婁農曰黃芩以秣歸產著後世多用條芩滇南多有土醫不他取也張元素謂黃芩之用有九然皆濕熱者一服清涼散耳千金方有三黃丸療五勞七傷消渴諸疾又謂久服走及奔馬夫黃芩苦寒矣又加以黃連大黃人非鐵石心腸乃堪日啜而月劑之也夫世之陰淫陽淫雨淫風淫晦淫明淫其疾非一端而所藥非所病又或諱疾忌醫以自戕其生者固多矣然有求

長生服金石丹毒暴躁癰疽背裂是不同擣椒而飲藥乎又惜
生太過無病而爲越吟者紙裹銀鐺無時離手喜寒喜熱不節
不時卒使藏腑血肉之軀消磨於薰灼蕩滌之味穀蔬不甘庀
羸益甚若是人者以不病而求病果何所爲而爲此夫漢唐之
不振皆人主不恤民而奸貪得以濁亂天下梁冀楊國忠之惡
是物先腐而蟲生人有疾而蠱甚勢有固然無足爲怪從未有
勵精求治飾以經術君勤於政相持以廉乃多方病民敲骨吸
髓使數百年平成之民一旦騷然不安其生而始終不悟如王
安石之相宋神宗者夫安石不過慕富國強兵之術如俗人之

求長生耳而假托官禮以惑英明之主與方士以房中術惑精強之人而妄稱神仙丹訣者何異病勢既亟有國醫者排難而爲之鍼砭幾幾乎沈痼去而神明生乃又溺於侍疾者與覲巫之羣吠而恐嚇不至於僵仆而巳吾不知彼以醫誤人誤天下又豈有所至樂而不得已耶夫使宋神宗僅爲安靜守成之主不汲汲於拓邊聚財變亂舊法宋雖弱人心不去或歷數傳而不至南徙李文正公不進利害文字呂正獻公講天錫勇智而引易神武不殺司馬文正公以鬼名山欲取諒祚以降謂滅諒祚復生一諒祚至引侯景之事爲喻其與諫唐憲宗之服金

石者非同一愛君之忱耶語云服食求神仙多爲藥所誤此爲有爲者言之也漢書曰無藥得中醫此爲中人言之也孟子曰天壽不貳修身以俟之所以立命也人主知命則富強神仙之惑可免矣人臣而知命則恬淫服食之患可免矣

白微

羌

山草卷之七



白微

白微本經中品救荒本草嫩角嫩葉皆可燉食江西湖南所產皆同根長繁故俚醫呼白龍須按細辛及已諸藥皆用根而根長多鬚大率相類諸家皆以根黃白柔脆粗細爲別然其苗葉皆絕不相類而諸家或畧之故俚醫多無所從唯因俗名採用反不致誤亂也

白鮮

四

山草卷之七



白鮮

白鮮本經中品圖經葉如槐花似小蜀葵根似蔓菁俗名金雀
更叔其苗可茹今湖南產一種白鮮皮與此異別入草藥

知母

三

山草卷之七



知母

知母本經中品爾雅蕁苳注一曰蜺母今藥肆所售根外黃肉白長數寸原圖三種蓋其非葉者

貝母

望

山草卷之七



貝母

貝母本經中品爾雅商貝母注根如小貝圓而白華葉似韭陸
璣詩疏葉如桔樓而細小子在根下如芋子正白圖經云此有
數種韭葉者罕復見之今有川貝浙貝兩種按陸疏以爲似桔
樓葉而細小郭注以爲似韭葉朱圖經以爲似蕎麥葉各說既
不同原圖數種亦不甚符今川中圖者一葉一莖葉頗似蕎葉
大理府點蒼山生者葉微似韭而開藍花正類馬蘭花其根則
無甚異果同性耶張子詩貝母階前蔓百尋雙桐盤繞葉森森
剛強願我蹉跎甚時欲低柔警寸心則又有蔓生者矣

元參

隸

山草卷之七



元參

元參本經中品形狀詳宋圖經有紫花白花二種

紫參

黑

山草卷之七



紫參

紫參本經中品一名牡蒙唐本草注紫參葉似羊蹄牡蒙葉似及已乃王孫也圖經又謂莖青細葉似槐葉亦有似羊蹄者五月花白色似蔥花亦有紅如水荳者蓋有數種滇南山中多有之與圖經同其如水荳者蓋作穗色粉紅相似花仍類丹參輩如蔥花者梢端開細碎白花成簇實似水芹蛇床等葉比槐葉尖長莖葉同緣根鮮時不甚紫近時方書少用滇本草通行十二經絡治風寒濕痺手足麻木筋骨疼痛半身不遂活絡強筋功效甚多宜溫酒服

雋婁農曰具收並蓄醫師之良今醫者但記十數湯頭所知者不及百種而治世間無窮之病藥肆所收又不過目前人所盡知之藥偶有缺乏展轉替代使人之五藏如木石無知則已耳若其五味五色各以類應其能聽醫師之假借乎夫以方治病猶以律斷獄東坡云讀書不讀律致君終無術然三代而後果能廢棄科條以無爲治天下乎引律不當何以斷罪輕比重比雖爲獄吏舞法之具而究不能妄援他條肆其刀筆者律爲之也記有竊賊例應刺左面者吏誤刺其右檢例知其誤乃腐去其刺而改涅焉醫不知藥其爲設刺可勝數乎

紫草

果

山草卷之七



紫草

紫草本經中品爾雅藐苾草圖經苗似蘭莖赤節青二月花紫
白色秋實白今醫者治痘癍破血多用紫草茸齊民要術有種
紫草法近世紅藍利羸十倍而種紫草者鮮矣圖經諸書皆未
詳的湘中徭崗及黔滇山中野生甚繁根長粗紫黑初生鋪地
葉尖長濃密白毛長分許漸抽圓莖獨立亭亭高及人肩四面
生葉葉亦有毛夏開紅筍子花無瓣亦不舒放茸跗半含柔枝
盈幹層蔕四垂宛如瓔珞遵義府志葉似胡麻幹圓結子如蘇
麻子秋後葉落幹枯其根始紅較諸書叙述簡而能類

李時珍
謂根上

有手而未言其花
葉殆亦未見全形

按說文莫草也可以染流黃臣錯按爾雅藐
紫草注一名茈莫臣以爲史儀制多言綠緝綬卽此草所染也
又按五方之間色有留黃其色紫赤黃之間蓋元冠紫綉萌於
魯桓漢魏綰綸送同褻服貴紅藍而賤紫蒨

鄭注掌染草
謂之紫蒨

尙循

奪朱之惡歟

秦艽

四八

山草卷之七



秦艽

秦艽本經中品圖經河陝州軍有之葉如蒿苴梗葉皆青今山西五臺山所產形狀正同唐本草字或作糺作糾作膠正作芘按唐韻作苴此草根作羅紋則苴字爲近古方爲治黃要藥今治風猶用之



黨參

四九

山草卷之七



黨參 附

黨參山西多產長根至二三尺蔓生葉不對節大如手指野生者根有白汁秋開花如沙參花色青白土人種之爲利氣極濁案人參昔以產澤遼上黨及太行紫團者爲上皆以根如人形三椹四椹五葉中心一莖直上爲真今形狀迥殊其可謂之參耶舉世以代神草莫知其非而服者亦多胸滿氣隔之患山西通志謂黨參今無產者殆曉然於俗醫之誤而深嫉藥市之售僞也余飭人於深山掘得蒔之盆盎亦易繁衍細察其狀頗似初生苜蓿而氣味則近黃耆昔人有以野苜蓿誤作黃耆者得

非此物耶舉世服餌雖經核辯其孰信從但太行脈厚泉甘此
草味甜有汁養脾助氣亦應功亞黃耆無甚感鬱之人藉以充
潤腸胃當亦小有資補若傷冒時疫以此橫塞中焦羸尫雜症
妄冀蘇起沉疴未覩其益必蒙其害世有良工其察鄙言

黨參

山草卷之七